

समा. 09.20 Hrs

Headlines

- लैफ्टिनेंट गवर्नर मनोज सिन्हा हों आखेया जे भगवान बुद्ध हुंदे पवित्तर अवशेष भारत लेई आंदे गेदे न, पर कलमिकया च उंदी चिर स्थायी मौजूदगी लोकें गी आध्यात्मिक तौर पर जागृत करदी रौहग।
- शिक्षामंत्री स्कीना इतू हों आखेया ऐ जे सरकार पूरे जम्मू-कश्मीर दे विद्यार्थियों गी भलेयां अज्जै-कल्लै आहलियों सहूलतें कन्नै लैस शिक्षा प्रणाली देने लेई वचनबद्ध ऐ।
- 33एं मेदवारें दंडु असैम्बली चुनां हल्लें लेई भरे नामांकन, बडगाम च 20 मेदवार चुनां मैदान च न ते नगरोटा च 13.
- Rising Star कोर दे GOC हों कठुआ जिले दे बनी मछेडी सैक्टर च अभियान सरबन्धी तयारियें दा लेया जायजा।
- बडगाम-बनिहाल वशेष रेलगड्डी हून औंदे 30एं दिनें तोड़ी संगलदान तकर जाग।

LG Holy Relics

लैफ्टिनेंट गवर्नर मनोज सिन्हा रुस दे कलमिकया गणतंत्र दे अपने ब्रंऊ-दिनें दे दौरे मगरा दिल्ली परतोई आए न। श्री सिन्हा भगवान बुद्ध हुंदे पवितर अवशेष गी भारत आनने लेई गेदे

प्रतिनिधिमंडल दी अगुआई करा'रदे हे। कलमिकया गणतंत्र दी राजधानी Elista च भगवान बुद्ध हुंदे पवितर अवशेष गी प्रदर्शित बी कीती गया।

लैफ्टिनेंट गवर्नर होरें एक्स पर अपनी इक पोस्ट च लिखेया जे पवितर अवशेष दी प्रदर्शनी कन्नै आध्यात्मिक सम्पर्क गैहरा होआ ऐ ते एहदे नै भविक्ख दियें पीढ़ियें लेई एह शांति ते प्रेरणा दा स्रोत बनेया रौहग।

भगवान बुद्ध हुंदे पवितर अवशेष घर लेई आंदे गेदे न पर कलमिकया च बी लोकें गी उन्दे थमां प्रेरणा थोहन्दी रौहग।

<><><><><><>

Itoo Education

शिक्षा मंत्री स्कीना इतू होरें आखेया जे सरकार अन्थक जत्न करा रदी तां जे प्रदेश दी हर थाहर पर पढ़ने आहले बच्चें गी आधुनिक शिक्षा सुविधा हासल होई सकन। एह गल्ल मंत्री होरें उड़ी दे बोनियार इलाके च आयोजित इक कार्यक्रम गी सम्बोधित करदे होई आखी। इ'स मौके पर बोलदे होई उ'नें आखेया जे शिक्षा प्रगति लेई अत लाज़मी ऐ। उ'नें आखेया जे सरकार दा मकसद ढांचागत वित्थ गी पूरना ते ज्ञान लेई समावेशी माहौल तयार करना ऐ। बारामूला च आयोजित इक होर कार्यक्रम च इतू होरें शिक्षा, नमियें काहड़ें ते विद्यार्थियें दे पूरे-पराते विकास दी जरूरता पर जोर पाया।

<><><><><><>

कल 33 मेदवारें बडगाम ते नगरोटा विधानसभा हलके लेई अपना नामांकन भरेया ऐ। नामांकन भरने दा कल खीरी ध्याड़ा हा। आकाशवाणी जम्मू संवाददाता दी रिपोर्ट मूजब 27 बडगाम सीट लेई, 20 मेदवारें अपना नामांकन भरेया जिसलै जे, 77- नगरोटा विधानसभा हलके लेई, 13 मेदवारें अपना नामांकन दाखल कीता ऐ। बडगाम सीट लेई नैशनल कांफ्रेंस नै आगा सईद महमूद गी अपना मेदवार बनाया जिसलै के पिपल्स डेमोक्रेटिक पार्टी नै आगा मुंतजर मेहदी, भारतीय जनता पार्टी नै आगा सईद Moshin गी ते आम आदमी पार्टी नै Deebe Khan गी अपना मेदवार बनाया ऐ। इंदे सनें कुल 20 मेदवारें अपना-अपना नामांकन भरेया ऐ। ताई जम्मू खिते दी नगरोटा सीट थवां भारतीय जनता पार्टी दी देवयानी राणा, पैंथर्स पार्टी दे हर्ष देव ते नैशनल कांफ्रेंस दी शमीम बेंगम सनें कुल 13 मेदवारें अपना नामांकन भरेया। शमीम बेगम जेड़िया नैशनल कांफ्रेंस दियां मेदवार न, जिसलै उ'नें नामांकन भरेया तां उपमुख सुरेन्द्र चौधरी बी मौजूद हे।

<><><><><><>

Police Commemoration Day

अज्ज पोलिस यादगारी दिवस ऐ। इस दिन 1959 च 10एं दलेर पोलिसकर्मियें लद्दाख गी Hot Springs थाहरै पर चीनी फौज आसेया घात लाइयै कीते गेदे हमले च अपनियें जिंदे दा बलिदान दिता हा। अतुं थमां हर ब'रे 21 अक्तूबर, पोलिस स्मारकी ध्याड़ें दे रुपै च मनाया जंदा ऐ। रक्षामंत्री राजनाथ सिंह अज्ज नमीं दिल्ली च राष्ट्रीय पोलिस स्मारक पर पुष्प चक्र अर्पित करगंन। गृह राज्यमंत्री केन्द्री सशस्त्र पोलिस बलें दे अध्यक्ष, केन्द्री पोलिस संगठनें दे अध्यक्ष

बी पुष्प चक्र यादियै शहीदें गी शरदांजलि अर्पित करगंन। इस मौके पर केन्द्री सशस्त्र पुलिस बलें ते दिल्ली पुलिस आसेया इक परेड दा सरिस्ता बी कीता जाग।

<><><><><><>

Satish Golf Tourney

युवा सेवा ते खेड सरबन्धी मैहकमे दे मंत्री सतीश शर्मा होरें जम्मू तवि गोल्फ कोर्स Sidhra च आयोजित दिवाली कप-2025 दे समापन समारोह च हिस्सा लैता। इसदा आयोजन जम्मू तवि गोल्फ कोर्स नै सैलसफा मैहकमे कन्नै रलियै कीते दा हा। इ'स मौके पर बोलदे होई मंत्री होरें आखेया जे गोल्फ सरबन्धी सैलसफा गी भविकख च होर बढ़ावा दिता जाना लोइचदा तां जे सरबन्धी कार्यक्रम नियमित तौर पर आयोजित होई सकन। उ'नें आखेया जे इय्यै नेह आयोजन कन्नै जम्मू-कश्मीर गी अंतराष्ट्रीय गोल्फ सरबन्धी नक्शे पर आनने दा मौका थोग। इ'नें आयोजन राएं मुकामी प्रतिभा गी बी बढ़ावा थोन्दा ऐ। इ'स मौके मंत्री होरें जेतुएं च ट्राफी ते स्मृति चिन्ह बी भेंट कीते।

<><><><><><>

GOC OP Preparations

Rising Star कोर दे GOC लैफ्टिनेंट जनरल राजन शरावत होरें कठुआ दा दौरा लाया ते संवेदनशील इलाके च तैनात बलें दी तयारियें दा जायजा लैता। आकाशवाणी जम्मू संवाददाता दी रिपोर्ट मूजब लैफ्टिनेंट जनरल होरें बनी –Macchedi सैक्टर दा दौरा लाया ते उत्थे तैनात बलें दी तयारियें ते उन्दी तैनाती दा जायजा लैता। उ'नें उत्थे तैनात बलें कन्नै गल्ल कीती ते उंदी

दलेरी, निष्ठा ते उच्च म्यार आहली कारवाइयें ते म्हेशा सौहगा रौहने लेई उन्दी सराहना कीती।
बनी –Macchedi इलाके च केंई हमले ते टाकरे पिच्छले इक डेढ़ बरे च होए न। इस इलाके गी
डोडा, किश्तवाड़ ते उधमपुर जिले च घुसपैठ करने लेई इक रस्ता मन्नेया जंदा ऐ।

<><><><><><>

Special Train

भारी रश ते यात्रियें दी मंग गी दिक्खदे होई रेलवे प्रशासन नै बडगाम-बनिहाल विशेष रेल गी
संगलदान रेलवे स्टेशन तगर अगले 30 दिन तगर चलाने दी घोषणा कीती ऐ। एह सुविधा
अज्जै थवां शुरु होआ रदी ऐ। आकाशवाणी जम्मू संवाददाता दी रिपोर्ट मूजब यात्रियें दे रश गी
दिक्खदे होई खास रेल गी संगलदान तगर चलाने दी घोषणा कीती गेई ऐ तांजे यात्रियें गी होर
मती सौख ते सुविधा होई सकै। कश्मीर रेल नैटवर्क दे लगातार विस्तार ते पिच्छले किश समे
दौरान होए दे बड्डे बदलावें दे मददेनजर एह फैसला लैता गया ऐ।

<><><><><><>

GST

जी.एस.टी दिएं घटी दियें दरें कन्नै गृहणियें ते परोआरें गी बड़ी मती मदाद हासल होआ रदी ऐ
कीजे रोजमर्रा च बरतून होने आलियें चीजें -बस्तें, उभोक्ता इलैक्ट्रानिक्स ते सेहत सेवां सस्तियां
होने करी आम आदमी दे बजट पर खरा असर पेया ऐ ते ओहदी खरीद समर्थ बधी ऐ। रामबन
जिले च बी लोक हाल च कीते गेदे जी.एस.टी. थमां लाभ ठोआ'रदे न। केइयें चीजें पर टैक्स
खासा घटेया ऐ जेदे नै लोकें गी सिद्धे-सिद्धे माली राहत पुज्जी ऐ। दुद्ध, पनीर ते बिस्कुट,

मक्शन ते घियो जनेहियें डब्बा-बंद बस्ते पर जां जी.एस.टी. खत्म कीता गया ऐ जां भलेयां घट्ट जेदे नै रोज इस्तेमाल कीती जाने आलियें चीजें दे भाह घटे न। आकाशवाणी खबरें कन्नै गल्ल करदे होई इक गृहिणी गीता होरें दस्सेया.

<><><><><><>

DC Ramban –Tatapani

रामबन दे डिप्टी कमीशनर मोहम्मद इलयास खान होरें कल गूल उप-डिविजन च ततापानी थाहरै दा दौरा लाया ते सैलानी सहूलतें दा जायाजा लैता। उन्नै सैलानियें थमां इस थाहर उपलब्ध सहूलतें बारे उंदी प्रतिक्रिया बी हासिल कीती। ततापानी -संगलदान च तत्ते पानी दा चश्मा इक कुदरती Geothermal करिश्मा ऐ जेड़ा अपने औषधीय गुणें लेई जानेया जंदा ऐ। एह चश्मा लगातार कुदरती रुपै नै ततापानी दिंदा ऐ- जेड़ा केइयें बमारियें गी ठीक करदा ऐ। इस करी ततापानी इक बड़ी लोकप्रिय थाहर बनी गेदा ऐ जित्थे जम्मू-कश्मीर ते गोआंडी राज्यें थमां लोक औंदे न।

<><><><><><>

DC Rajouri –Badminton Court

राजौरी दे डिप्टी कमीशनर अभिषेक शर्मा होरें स्पोर्ट्स स्टेडियम Khocora च नमें विकसति बैडमिंटन Court दा उदघाटन कीता इसदे कन्नै जिले च खेड्ड ढांचे गी होर मजबूती ते खेड्डें गी बढ़ावा देने च सौख होग। उदघाटन परैन्त डिप्टी कमीशनर होरें खडारियें कन्नै गल्ल कीती- जिंदे च मुक्केबाजी, बैडमिंटन खडारी ते होर दुए युवा खडारी शामिल हे। उन्नै सारे खडारियें गी

निष्ठा ते उंदी मेहनत दी सराहना कीती। डिप्टी कमीशनर होरें स्टेडियम च उपलब्ध खेड्ड
सरबंधी ढांचे दा जायजा लैता ते जम्मू-कश्मीर खेड्ड परिषद दे अधिकारियें गी हिदायत कीती जे
एह युवा खडारियें दी प्रतिभा गी निखारने ते होर मते युवाएं गी खेड्डें च शामिल करने पर
ध्यान केन्द्रित करन।

<><><><><><>